



## Weitere Jugendfestsprüche 2023

### Bögen

#### Zeughausstrasse

##### Kafi West

---

D Bildig, de gröscht Schatz,  
Für das het s zwenig Platz.  
I glaub es wär schlauer,  
Statt zwe Stöck en Primetower.

Gli gits no e Boustell meh  
Für eusi Kanti, wirsch es gseh.  
De Standort lit doch ideal –  
Regierigsrot, triff dini Wahl!

Länzbig oder Windisch:  
De Standortrit isch chindisch,  
Will, Dani und Heidi:  
E Kanti gits für beidi.

##### Coop • Reformiertes Kirchgemeindehaus

---

Es lüpft eim fascht de Deckel,  
Umwäg gönd eim uf e Seckel,  
Au a Bahnhof bruchts meh Schnuf:  
Wenn hörts ächt ändli uf?

Du Schuelruum-Anti,  
Wetsch doch e Kanti?  
Stimm für d Bildig – avanti!

De Rügel wird verkauft,  
Will d Vermietig nümme lauft.  
Ziend s jetzt im Chilegmeindhus  
Au no bald de Stecker us?

Hesch im Sommer heiss,  
Mach doch e Glacé-Kur.  
Was aber jede weiss:  
So gits kei Bikinifigur!

### Aavorstadt

##### Albani • Südseite

---

Vo vore und hinde  
Chasch d Raser iez finde,  
Mit em Radar erfasse  
Zum Wohl vo de Kasse.

A d Stross chläbe wär hüt lätz,  
Simmer doch z Fuess unterwägs!

I de Badi chamer schwimme,  
A de Urne chamer stimme.  
Bi beidem isch es mängisch knapp –  
Machschen Taucher, sufsch ab.

I dr Pfleg vo de Alte  
Chönnes d Lüt nümme bhalte.  
Wieso holt si s AZOM  
Nid wie s KSA z Rom?



### Migros • Nordseite

---

Wird bim Regiere Gschirr verschlage,  
Muess de Stadttrot nümm verzage.  
Schnell behobe isch de Schade  
Dank em neue Porz'llan-Lade.

Wie im «Empire of Light»  
Triffsch im Urban d Vergangeheit.  
75 Jahr als Kino –  
E wohre Liechtspel-Dino.

Euse Aabach  
Blibt mängisch flach –  
Chli meh Räge  
Wär für alli en Säge.

### Burghaldenstrasse

#### Restaurant Burghalde • Ziegelrain

---

Mir alli wäre froh  
Um die neuu BNO.  
Brucht ächt d Behörde gli  
Chli Noehilf vo ChatGPT?

ChatGPT:  
Mir fällt nüt i.  
Cha nur no KI  
Min IQ isch gsi.

Gsägnet simmer kulinarisch –  
Aber säg öpps würkli wohr isch:  
S Rosmarin wott fasziniere  
Und als one-man-show agiere.

Ich wett, ich wär  
En Gummibär.  
De müessti nid stoh und warte,  
Sondern hüpfte vo Garte zu Garte.

#### Ochsen • Parkplatz Seifi

---

Leider isch es keis Gschpässli:  
D Ruine am Stadtgässli  
Blibt is no lang erhalte.  
Muess no a Zeusler walte?

Vill zvill Stross wird grad saniert,  
De Kasse-Schmid drum lut moniert.  
S fehlt Buesse-Gäld, er wärdets gseh,  
Will d Auto nömm chönd Vollgas geh.

### Römerweg

#### Schützenmatte • Adam Touring

---

S Schloss sell lüchte, dasch de Plan,  
D Strommangellag tribt eus in Wahn.  
Jetzt cha euse Fauchi-Drache  
Ime Geisterschloss sin Unfug mache.

Nach 60 Jahr Adam-Touring  
Ghört au mol d Eva as Stür!

Uf dr Schützi gits keis Gfächt.  
Mir isch das grad no rächt.  
Wäg de Freischare-Vakanz  
Gits drum au kei Fridestanz.

Adam-Touring  
+ Bleeschade-pairing  
= Service-enduring.



## Kirchgasse

### Stadtbibliothek

---

Apolitisch, brav und nett,  
Das isch was de Stadttrot wett.  
Mer dörfe nüt me kritisiere,  
Scharfi Zunge tüends zensiere.

No hock ich do  
Und dichte froh,  
Doch ChatGPD  
Ersetzt mi gli.

### Willener • Vicolo

---

Mer sett s Rothusdach saniere.  
Das loht eus ächt studiere,  
Öb hinder dene Rothuswänd  
Nid no ander en Dachschatte händ.

I de Nacht, s git mr ke Rueh,  
I gsehs nömme, i gibts zue –  
Det wos Schloss isch gstande  
Tuet min Blick versande.

Wüsseders noni?  
Nenei, nid wäg de Boni...  
I dr Hypi laufed schints Prozäss  
Zur Übernahm vo dr UBS...

## Rathausgasse

### Willener • Asia Take Away

---

D Grüchtechuchi brodlet drüberus:  
En Banke-Deal stöi neu is Hus.  
D Hypi übernahm – kei Witz –  
D UBS grad wie de Blitz.

D Stadt wett d Stromlücke  
Ohni Liechtli überbrücke.  
De Chlaus seit – ihr Guete –  
Für das gits e Ruete!

Edgar mir ziehnd de Huet,  
Winked zur verdiente Rueh.  
Heschs gmacht so guet,  
Es brucht neu zwe dezue!

### Hirschen • Beldona

---

Tier und Vögel verschont,  
D Belüchtig ganz nett.  
Neu schint nur de Mond  
Mit em Schlosslicht um d Wett.

Eifach guet  
Sind nid vil Sache.  
S brucht chli Muet –  
Me mues' au mache!



## Leuengasse

### Seite Kronenplatz

---

Fühlsch di Royal –  
Blaublüetig pränatal?  
Denn passisch i die Zone!  
Mit allne under ei Chronel!

S brucht dringed good News,  
Suscht trifft eus de Blues –  
E Kanti i de Stadt:  
Das wär doch glatt.

De Chronelplatz – autofrei!  
Es Stadion bim Römerstei,  
Es Hallebad i dr Mehrzwäckhalle...  
Utopie? Würds euch gfalle?

Hetze und strebe  
Für e Wirtschaftsmotor –  
Oder eifach nur lebe  
Im Stadtlabor?

## Brunnen

### Altersheimbrunnen

---

Dank Straumann und Kumpane  
Tüend au mer Alte wider zahne.

### Begegnungsbrunnen

---

Fride, Freud und Eierchueche –  
Mues mer do uf TikTok sueche?

Wenn dr öppis gfallt,  
Tueschs laike!  
Tuesch es disse –  
Ischs versch...

Gump durs Grünen  
Bevors zu Beton wird!

(Thema: Freude, Lachen, Spass)

### Cholerabrunnen

---

Hey You  
Magsch Muh?  
Voilà  
Chum a d ALA.

Öpfel gönne, Tierli streichle,  
De Buure a de Ala23 schmeichle.

(Thema: ALA23)

### Güggelbrunnen

---

Wottsch Biodiversität,  
Muesch nid a d Universität –  
Gang i d Natur, i Wald,  
Det findsch si bald.

De Güggel uf em Güggelbrunne  
Luegt verwirrt i d Morgesunne,  
Frogt sich, ob er sini blutte Füess  
Jetzt au i Schueh verstecke müess.

(Thema: Biodiversität)



### **Moritzbrunnen**

---

De Fauchi grunzt vergnüegt  
De Schlossherr heb sech gfüegt,  
Sig sim Wonsch nochecho  
Er dörf znacht wider usegoh!

(Thema: Schloss)

### **Muschelbrunnen**

---

I mim Härz hets nur ein Platz –  
De für mi Jugetfescht-Schatz.

### **Museumsbrunnen**

---

Nach dere Usstellig  
Chasch d Burghalde  
Entwalde.

Mag nüm warte  
Uf Gläser voll Wi,  
Wo klinge im Garte  
Vo dr Villa Sunneschi.

(Thema: Schatzkammer Wald)

### **Ochsenbrunnen**

---

S Mieghus wird renoviert  
Zum Begänisort formiert.

### **Römerwegbrunnen**

---

Es chonnt es Zwärgli z laufe,  
Will Benzin isch tür zum Chaufe.

Für d Zwärge es Schlaraffeland  
Für d Eltere e hälfendi Hand.

(Thema: Zwergenland)

### **Schmittenbrunnen**

---

Bi dene schöne Blueme  
Isch nid nor s Bienli am guene.

De Mairäge isch verbi,  
Es cha ändli Sommer si.

(Thema: Blumen)

### **Sodbrunnen Ziegelacker**

---

Alli laufe in blau und wiss –  
Jugetfescht, das isch mis.

### **Steinbrüchliwegbrunnen**

---

D Vögel piffes vo de Äscht,  
Hüt isch wider Jugetfescht.

Es brönnt, es tuet, es macht –  
S Schloss und das au z Nacht.

### **Warteckbrunnen**

---

Fride isch e Gottesgab –  
Wüsst das doch de Russechnab!

Oh chäm doch nur e gueti Fee –  
De gäbs ke Chrieg und Krise meh!

(Thema: Frieden)

### **Widmebrunnen**

---

Jetz hani welle d Blueme güsse –  
Ha bi dr Boustell warte müesse.

Es Bluememeer erfreut doch s Härz,  
Lot öis vergässe Angst und Schmäz.

Gschmückti Brünne, Bluemechränzli,  
Uf de Schützi de es Tänzli.

(Thema: Blumenmeer)